

全華叢書

全華叢書

九靈山房遺藁卷三

元戴良著

郡後學胡鳳丹月樵校梓

山居藁

五言古

苦齋

薄游倦簪履斂性偃林阿羣峰旣旁繞眾卉亦前羅
暄風改故柏微陽變陳蘿茶生緣堦上櫟長卽軒多
察性奉柔葉辨味掇芳柯苦節旣可貞佳名矢弗訛
享歎寵王使集蓼奠王家尊盛猶若茲庇賤將奈何
願使卜身玦庶免後賢嗟

叶

看松菴

結構在中林林木何離離
簷隅聳喬幹庭際俯樛枝
蜿蜿鹿尾揚矯矯龍形垂
稠陰暗軒戶積髓滑堦基
美人游未還素心適在茲
豈不念封植無由敦佳期
岱畎稱夏書徂徠詠周詩
屈身古則然違志今豈非
急雪交橫至嚴飈左右吹
所貴貞白質不爲歲寒欺
同子充濬仲遊北山夜宿覺慈院

窮年厭喧囂今晨愜游衍
豈伊清曠懷直爲朋知展
指途陽已昇入谷光未顯
涉流旣百折尋山亦千轉

停策樹頻倚攀林芳屢蹇路夷始出幽山暝復凌緬
佛廬旣栖薄僧榻聊息偃地僻心自怡俗遠慮乃遣
明發有佳趣勝處將厯踐

抵智者

已宿隆壽山復踐靈源境蜿蜒苔逕長犖确石路整
行愛祇樹密坐悅禪枝靜幽意澹不愜游足憇復騁
睇瀑跋崇基追雲躡曾頂行行路已窮望望日將暝
泠泠風出谷皎皎月窺嶺翳翳羣動息寂寂紛務屏
以之觀化機緬焉發深省此身如露電百年亦俄頃

如何乖賞心驅馳昧風景緣業尙可除庶茲慰延頸
從智者游九龍謁劉孝標祠

上人敬愛客追從不知疲昔聞蠟屐游今見飛錫隨
朝曦烜將出曉露泣未晞捫葛緣側徑披榛欵幽扉
水聲激礧滑鍾韻出林遲佛廬從中起祠宇亦傍依
行歌懷昔賢趨拜想前徽躑躅久不去此情誰得知

往山洞

旣停九龍策漚醕禮前賢復尋三洞蹊秉玉朝羣仙
羣仙去綿邈遺迹費采甄標峰絢霞外裂竇綵雲間

旁聽流活活俯瞰深淵淵脊曲駭初入膝阻艱屢遷
躡迫方螭伸緣隅乃猴牽冥行路易失前導火頻然
傾壁見斜倚危室覩孤圓穴杳石如透潭空海疑連
涉深怯龍躍出險怵途慳紆徐度虛隙恍惚脫重泉
僕御矜乍往朋徒慶生還夙志愛游役芳時屢徂讐
流光忽我邁踐勝及茲年棲息固有期遲莫復何言
二皇倘可值頽齡庶能延

登鹿田

山北倦遊覽山南縱攀援苔滑豈可步蘿弱猶足捫

力竭轉脩蹊險盡得平原排峰作郭郭列岫代墉垣
披拂趨蘭社靡迤入松門奇石旣羅逕初篁亦當軒
鹿耕事固遠仙化迹還存野田遺舊場孤豕祕精魂
感往情已劇懷來念彌敦學道值時阻攝生逢景奔
何能棄緣業卽此窮朝昏

贈別祝彥明

悵望臨荒蹊驅馳騁遐步江紆練月初山標彩霞莫
天長路易迷水深舟難渡征人去不息倦僕立相顧
此時悲送君安能髮不素

七言古詩

雙劍篇

君不見干將冶鐵鐵不流，
鑄邪遇之剪指投，赫然鍊
成雙寶劍，送匿其陽以陰獻。
雌雄離隔經幾年，一朝
飛墮君侯前，乃知神物不虛授。
必待英豪始聯偶，從
今永近君侯身。玉頭珠口相鮮新，
韜裏束來白鷗尾。匣中藏卻綠龜鱗，
遭時未息干戈事。且爲君侯充武
備，黑犀中斷未爲奇。白蛇夜斬方稱利，
五山精六金英也。曾埋沒豫章城，
時時紫氣斗閒明。占者已知吾

國興君侯佩之可千齡

秦鏡歌

玉之榮石之英光瑩豈若秋金精秋金之精鑄鏡成
良工錫以銀華名銀華顏色如霜雪攜向秦宮歎奇
絕珊瑚臺上吐菱花玳瑁匣中生明月夜籌已竭曉
籌終宮女對之難爲容雲鬢被首黛渝色我貌如心
不堪飾早知鑑心如鑑貌漢兵敢犯咸陽道咸陽漢
殿空中立秦鏡團團晝飛入至今鬼母夜深泣

白紵歌

闔廬宮中夜撾鼓宮樹烏啼月未午玉缸提來酒如
乳白紵衣成向君舞美人醉起行步難腰間珂珮聲
珊珊肯緣嬌愛減君歡寶釵墮地不敢言宮中門戶
多無數君恩反覆日幾度明朝重着舞時衣心中已
道不相宜

空城雀

汝雀汝雀亦何爲有身不向他處飛卻入空城長苦
飢空城四面盡焦土滿地青蒿幸無主飛來飛去啄
蒿實旣無矰兮復無罟豈不見官倉有鼠食官米所

食縱多寧損幾一朝倉吏來捕爾爾罪莫逃終磔死

當窗織

當窗織貧家女兒堪歎息隔牆惟聽伊軋聲墮珥欲
收應不得兩日織成花錦段盡輸上官猶誠緩夫婿
復來催上機豈念身穿藍縷衣君不見富家娘不識
蠶繅著繡裳

涼州行

涼州城南聞打鼓涼州城北盡胡虜羽書昨夜到西
京胡兵已犯涼州城涼州兵氣若雲黑百萬人家皆

已沒漢軍西出笛聲哀胡騎聞之去復來年年此地
成邊土竟與胡人相間處胡人有婦能漢音漢女亦
解調胡琴調胡琴按胡譜夫婿從軍半生死美人踏
筵尙歌舞君不見古來邊頭多戰場生男豈如生女
强

短歌行

青天上無根日馳光暫明還復黑晝夜相催老卻
人忽忽吾年四十七偶看舊鏡鏡爲羞昔髭未生今
白頭朱顏丹藥已難覓青史功名行且休歲歲年年

待富貴富貴不來老還至老既至兮百事非病妻對
之怨且詈妻年比我雖稍卑近亦摧頽如我衰一生
世離殆居半此世歡娛能幾時縱多子女知何益北
邙冢墓無人識古往今來共如此我亦胡爲空歎息
人生滿百世豈多尊中有酒且高歌有酒不歌奈老
何

五言律

除夜客中二首

歲月遽如許蹉跎老卻人一年惟此夜明日又逢春

湖海未歸客風塵多病身感時渾不寐燈火獨相親
擾擾百年內悠悠萬事虛青雲時不至白首歲將除
畫燕空隨俗占雞懶發書未知從此去身世復何如

郡齋度歲二首

失腳雙溪路今經幾度春不堪飛雪夜還作望鄉人
世事方如夢生涯笑此身惟應兩蓬鬢不負歲華新
條風纔應律柏酒又浮盃舊臘隨宵盡新年逐曉來
浮生蒼狗變莫景白駒催自歎憂時客初心寸寸灰

寄寧之鵬南兄弟二首

攜家非得計世亂粗求安有季俱行役誰人救急難
月從愁裏沒雪向望中寒昨夜鄉書到知君不忍看
一自干戈後先廬幾處存遽城豺虎峽愁殺鵲鴿原
歲酒空今夕春風非故園憂來無避處只是倚衡門
示全真張子愚

無從歸故國客思滿窮秋兩地隔千里一身翻百憂
夢回高士榻情繞羽人丘我亦栖栖者時同說舊游
贈友

擾擾干戈際天涯人未歸一身爲逆旅十月未寒衣

江漢風波阻鄉關書信稀危途恐相失歲晏重依依
投王郡守二首

已落時人後誰能說姓名惟應馬南郡偏重鄭康成
賓館懸床待公庭罷吏迎爲居門下久童僕亦多情
卒歲囊無褐爲儒坐有氍每因官俸薄時動故人憐
慷慨空前志蹉跎已莫年爭如歸去好家在白雲邊
投同僉公

授鉞幾專征分藩復此行身爲漢飛將家若魯諸生
祕略三邊服妖氛一劍橫已多門下客持筆待功成